


Ա Կ Ա Ն Ա Վ Ո Ր Գ Ր Ա Կ Ա Ն Ա Գ Ե Տ Ը

(ՀՀ ԳԱԱ ակադեմիկոս Արամ Գրիգորյանի ծննդյան 80-ամյակի առթիվ)

Լրացավ անվանի գրականագետ, բանասիրական գիտությունների դոկտոր, պրոֆեսոր, ՀՀ Գիտությունների ազգային ակադեմիայի իսկական անդամ Արամ Պարույրի Գրիգորյանի ծննդյան 80-ամյակը:



Ա. Գրիգորյանը ծնվել է 1930 թ. սեպտեմբերի 28-ին Թիֆլիսում: 1953 թ. ավարտել է Երևանի պետական համալսարանի բանասիրական ֆակուլտետը: Գիտաաշխատանքային գործունեությունը սկսել է 1953 թ.՝ որպես ՀԿԿ «Կոմունիստ» ռուսերեն պաշտոնաթերթի գրականության և արվեստի բաժնի աշխատակից: 1958 թ. առ այսօր Արամ Գրիգորյանն աշխատում է ՀՀ ԳԱԱ Մ. Արեղյանի անվան գրականության ինստիտուտում, նախ՝ որպես կրտսեր, ապա՝ ավագ գիտաաշխատող, տնօրենի տեղակալ: Այժմ գրականության տեսության բաժնի վարիչն է:

Իրեն բնորոշ գիտահասարակական գործունեությամբ այս անցնող տասնամյակների ընթացքում նա գրականության ինստիտուտում աշխատելուն զուգընթաց եղել է նաև Հայաստանի գրողների միության քարտուղար, ՀԳՄ «Литературная Армения» ամսագրի խմբագիր, իսկ 2003 թ. սկզբից նրա գործունեությունը սերտորեն կապվում է նաև Ռուս-հայկական (Սլավոնական) համալսարանի հետ, որտեղ ռուսաց լեզվի ու գրականության և մշակույթի իր հարուստ գիտելիքներն է փոխանցում այդ բնագավառների ապագա մասնագետներին ու մանկավարժներին:

Ա. Գրիգորյանի գրչին են պատկանում «Եղիշե Չարենց» (Մոսկվա, 1959), «Եղիշե Չարենցի պոեզիան» (Երևան, 1961), «Գեղարվեստական ոճի հիմնահարցերը» (Երևան, 1966), «Գեղարվեստական ոճի և պատկերի կառուցվածքը» (Երևան, 1974), «Գրականությունը և տեսությունը» (Երևան, 1976), «Քննադատությունը և գրական ընթացքը» (Երևան, 1979), «Գրական երկի կառուցվածքի վերլուծությունը» (Երևան, 1984), «Ոճային որոնումները և գրական զարգացումը» (Երևան, 1987), «Գրական ստեղծագործության ամբողջականությունը» (Երևան, 2004) մենագրությունները: Նրա ավելի քան հարյուր հոդվածներ լույս են տեսել գիտական և գրական տարբեր պարբերականներում, այդ թվում նաև մոսկովյան այնպիսի հեղինակավոր հրատարակություններում, ինչպիսիք են «Вопросы литературы», «Дружба народов», «Литературная газета», «Советская культура». Առանձին մի խումբ են կազմում մոսկովյան ակադեմիական տարբեր հատորյակներում տպագրվածները, այդ թվում՝ «Խորհրդային բազմազգ գրականության պատմության» յոթհատորյակում, «Միասնություն», «ԽՍՀՄ գրողների համագումարները» և «Հայ գրականության պատմություն» հատորյակներում:

ՀՀ ԳԱԱ Մ. Աբեղյանի անվ. գրականության ինստիտուտի նրա գլխավորած բաժինը արդեն երկար տարիներ զբաղվում է նաև գրականագիտական տարբեր հասկացությունների և հիմնահարցերի հայ գրականությունում ունեցած անդրադարձի քննությամբ: Արդեն լույս են տեսել հինգ նման հատորներ, և շուտով կհրատարակվի վեցերորդը՝ «Հայ գրականությունը համաշխարհային գրականության համատեքստում» խորագրով հատորը: Նման մոտեցման և քննության մեթոդի ու կոլեկտիվ աշխատանքների կազմակերպման շնորհիվ Ա. Գրիգորյանը պատրաստում է գրականությունն առավել լայն հայացքով և ընդգրկմամբ դիտարկող երիտասարդ մասնագետներ:

Ա. Գրիգորյանի ուսումնասիրությունները միշտ էլ մեծ արձագանք են գտել միջազգային գիտական շրջանակներում, վկայակոչվել տարբեր երկրների հեղինակավոր գիտնականների կողմից: Բնորոշ մի օրինակ է ժամանակին ակադեմիկոս Դմիտրի Լիխաչովից ստացած հետևյալ նամակը, որը նշանավոր գիտնականը ժամանակին ուղարկել է նրա գրքերից մեկը ստանալուց և ընթերցելուց հետո՝ ի գնահատություն ասելով. «Շնորհակալ եմ Ձեզ ինձ շատ հարկավոր, կարևոր և հետաքրքիր գրքի համար»:

Ա. Գրիգորյանը ՀՀ ԳԱԱ Մ. Աբեղյանի անվ. գրականության և արվեստի ինստիտուտների և ԵՊՀ բանասիրական ֆակուլտետի գիտական խորհուրդների, Հայաստանի գրողների, Թատերական գործիչների և Կինեմատոգրաֆիստների միությունների անդամ է:

Նա Հայաստանի պետական մրցանակի դափնեկիր է, պարգևատրվել է «Պատվոն նշան» շքանշանով, ՀՀ ԳԱԱ նախագահության պատվոգրով:

Ա. Գրիգորյանը զբաղվել է Պուշկինի, Գոգոլի, Դոստոևսկու, Տոլստոյի, Չեխովի ստեղծագործությունների և ժամանակակից ռուսական բանաստեղծության քննությամբ ու վերլուծությամբ: Այսօր ևս շարունակում է իր արդյունաշատ գիտահասարակական և մանկավարժական գործունեությունը՝ հայ գրականությունը դիտարկելով ռուս և համաշխարհային գրականությունների համատեքստում և զբաղվելով գրականության տեսության ու գրական ժանրերին վերաբերող ամենատարբեր հարցերով, ինչպես և հայ-ռուս գրական կապերի պատմության ու այսօրվա հիմնախնդիրներով՝ գիտամշակութային բնագավառում իր կարևոր նպաստը բերելով հայ-ռուսական համագործակցությանը: Ասվածի խոստուն վկայությունն է գիտական վաստակի, հայ-ռուսական գործակցությանը և Հայաստանում ռուսական մշակույթի տարածման գործում ունեցած ավանդի համար Ա. Գրիգորյանին Ռուսաստանի Դաշնության Պուշկինի անվան մեդալով պարգևատրելը, որը վերջերս նրան անձամբ հանձնեց Երևանում պետական պաշտոնական այցով գտնվող ՌԴ նախագահ Դմիտրի Մեդվեդևը:

Այսօր ևս նա շարունակում է աշխատել երիտասարդական ավյունով, գիտագրական դասական ավանդները զուգակցելով թարմ և ինքնատիպ գաղափարների ու ըմբռնումների հետ՝ գիտական ավանդականության և նորարարության ու շարունակական որոնումների կենդանի օրինակ ծառայելով իր կրտսեր գործընկերներին:

ՌԱԴԻԿ ՄԱՐՏԻՐՈՍՅԱՆ
ՎԼԱԴԻՄԻՐ ԲԱՐԽՈՒԴԱՐՅԱՆ
«Ազգ», 05. X. 2010 թ.